

EDDIE WERLEMAN: BETICO A LAGA UN VACIO GRANDI ATRAS



ORANJESTAD: Sr. Eddy Werleman, lider di fraccion di PPA tambe a remarca ariba e noticianan cu tabata tin durante fin di si-

man cu tabata poco alentador bisando cu apesar di esey, e noticia di fallecimiento di Sr. Betico Croes, a cay como un sorpresa y

tabata un sla duro pa comunidad Arubano.

"Mirando cu e tabata un politico grandi, nos tin cu reconoce esey, pa locual a

wordo logra tambe door di su perseverancia, e ta un sla duro pa comunidad Arubano".

Segun Sr. Eddy Werleman tur hende sa cu e ta e luchador pa Status Aparte y door di e hecho cu e no a funciona den Staten pa motibo di e desgracia, el a laga un vacio atras.

"Nos por ripara esey y nos lo keda recorda esey tambe. Mi kier extende un palabra di condolencia na e familia. Mi sa cu nan tabata tin hopi di sufri pa motibo di e condicion cu Betico Croes tabata aden tur e tempo, y mi ta desea su familianan forza y cu Dios lo duna nan forza pa pasa den e dianan dificil aki", Sr. Eddy Werleman a laga sa.

MR. HECTOR GONZALES BETICO CROES TABATA UN POLITICO EXTRAORDINARIO

ORANJESTAD: Lider di fraccion di AVP, Mr. Hector Gonzalez no a haya fallecimiento di Betico Croes, como algo inespera sin embargo tabata un shock pa tur hende.

Esaki pasobra no ta un politico manera cualquier otro Betico tabata.

"E tabata un politico extraordinario y a dedica henter su bida na esey. Lo tin un vacio den desarrollo politico den futuro cercano

no di Aruba. No ta tur ora tin un lider cu cualidadnan di Betico Croes ta presenta su mes ariba tereno politico den un pais", Mr. Gonzalez a bisa.

El a sigui splica cu familianan di Betico Croes sigur a sufri hopi duranta maleda di Betico Croes y e ta kere cu di tur su curazon y di miembronan di su partido AVP por extende nan sentimento nan di pesame na familianan di Betico Croes.

PEDRO BISLIP:

PROVIDENCIA A DICIDI OTRO

ORANJESTAD: Segun presidente di Staten, Sr. Pedro Bislip cu tristeza a expresa cu Aruba a keda sorprendi cu e informacionnan di fallecimiento di Betico Croes.

Sorprendi pa motibo cu ultimo tempo tur noticia encuan to salud di Betico Croes tabata alentador.

"Asina bida ta, y Providencia a dicidi

otro. Aruba a perde un gran politico cu a laga indudablemente un vacio grandi atras den e mundo politico.

Con cu bo mire, sea como simpatizante of colaborador politico o sea contrincante politico, nos tur mester sa di reconoce su labor nan, su prestacionnan ariba tereno politico y estatal", el a laga sa.